

21^a

V
Aufw. III

Q. IV. 37.

Osiander, Andreas

u. weitere H. Schriften
Zur Polemik mit Osiander.

O. IV. 37

Das Sündri Ir=
thumb mit keiner vorgeffenheit
zustillen / oder hin zulez
gen sey.

Joachimus Wörlin. D.

Jere. 8.

Keiner ist /dem seine bosheit leidt were/
vnd spreche /was mach ich doch?

(Braunschweig 1555)

Handwritten text, likely bleed-through from the reverse side of the page. The text is mirrored and difficult to decipher but appears to contain several lines of script.

Handwritten text, likely bleed-through from the reverse side of the page. The text is mirrored and difficult to decipher but appears to contain several lines of script.

Handwritten text, likely bleed-through from the reverse side of the page. The text is mirrored and difficult to decipher but appears to contain several lines of script.



Alles liebester fromer Gott / wo
wil es doch mit dieser armē elenden verker-
ten welt hin? Lest es sich doch warlich an-
sehen / es wolle n̄hun auff die letzte Prophecey
Doctoris Martini seligers mit gewalt kommen /
das vor dem Jüngsten tag kurtz her / der meiste
theil es dafür halten werde / Religions v̄nd
Glaubens sachen / sein v̄nötige sachen / v̄nd
nach diesem elenden armen leben nichts mehr
zugewarten / dann auff v̄nd dahin / Dann lieber
Gott / wie ists sonst möglich / das man so leicht-
fertig / v̄nd mit kaltem hertzen in solchen wich-
tigen sachen handeln solte / als man doch leider
in dieser sachen thuet.

Wann ein Marius im Römischen Reich / ach
was sag ich darvon? Wenn ein schlechter elen-
der mensch in einem Dorffe widerwillen v̄nd
entpörung erwecket hette / Wie solte man wol
v̄ber seinen halse schreien? V̄nd Gott gebe das
etwa ein nachbar / dem andern einer Ganss den
fittich v̄nd flügel entzwey geworffen.

Alhie ist kein schlechte v̄neinigkeith von Do-
siandro v̄nd seinem anhang in vergencklichen sa-
chen erwecket / Sondern man hat mitten in die
Bibel gegriffen / keinem Artikel des Glaubens
v̄rschonet / Sondern sie allzumal / v̄nd einen je-
dern in sonderheit herumgerücket / v̄nd mit
grimmigem hertzen jemmerlich darein gerissen.
Daruber mit trötzigem muth in aller Welt alle
Christen zum kampff erfordert / Sie mit hon-
schmach /

Schmach / Schimpff / lester vnnnd lügenworten also
so öffentlich durch den fryen druck heraus gestri-
chen / das es kein Türck / kein Jude / ja kein Teu-
ffel in der hellen erger auff dieser erden dichten
vnd erdencken mag. Vnd ist in summa also an-
der reinen eintrechtigen lehr / Vnnnd an der ed-
len lieben zarten Mutter der reinen Kirchen ni-
chts nachgelassen oder vergessen / das zu beider
verkleinerung / ewigen schaden vnd nachteil mo-
chte gereichen.

Vnd damit man nicht gedencke / ich mache
die sache ohne nott gross / Wil ichs beweisen.
Erstlich / so viel die lehr belanget / hat man fürs
gegeben.

Wider den Ersten Artickel vn- sers Christlichen Glaubens.

Das Gott den menschen / als einem Aloss
von leib vnd Seele blut vnnnd fleisch / wie ander
Dibe geschaffen / ohne recht erkantnis weisheit
vñ gerechtigkeit / Vñ das aus dem spruch 1. Co. 2.
Animalis homo non percipit. &c. beweisen wollen.

Daraus eruolget / das in Adam keine Ge-
rechticheit / keine Weisheit / dann allein die ein-
wohnung Göttlicher natur gewesen / Gleich-
wol sey das Bilde Gottes nicht einartige zu-
neigung vnd vollige gehorsam des menschen zu
den willen Gottes gewesen / Sondern die mens-
schliche natur von leib vnnnd Seel.

Das auch die Gerechtigkeit im Gesetz er-
fordert / nicht sey ein vollkommener Gehorsam /
Sondern

Sondern Gottes wesentliche gerechtigkeit.

Wider den Andern.

Das es mit nichten die furnemste vrsach der menschwerdung Christi gewesen / die Sünden selig zumachen / Sondern damit Gott bey vns hette wohnen konen / Gleich als hette sonst Gott inn der vnschuld bey dem Menschen nie gewohnet.

Das die Göttliche Natur in vns wone wie in Christo.

Das Christus nicht von reiner ahr̄t vñnd natur gerecht.

Viel weniger sey vnser gerechtigkeit / (daruon Paulus leret. Ro. 3. etc) die vnschuld Christi / mit alle dem / das er gethan vñnd gelitten.

Ja wenn vnser gerechtigkeit solte iren vrsprung daher haben (gab dieser Schwerm̄er einer in einer Schrift / so ich noch bey mir hab / vñter den armen gemeinen Man aus) So müßte wir im zweiffel stehen ob solche gerechtigkeit ohne Sünde were / oder nicht / Sintemal Maria auch eine Sünderinne geborn / darumb auch ihr Sohn müste Sündlich sein / etc.

So reiniget vns nicht das Blut Christi / sondern die Gottheit im blut.

In Summa vnser Gerechtigkeit sey nicht der Son allein / der do Mensch worden vñnd gecreürtziget / Wie Paulus vñnd Jeremias sagen / Sonder auch Gott der Vater vñnd heilige Geist.

A iij Ja

Ja Christus der gestalt geprediget / das er
damit vnser Gerechtigkeit sey / wil er mensch
worden / mit seinem leiden vnd Auferstehen ver-
gebung der Sünden erworben / etc. sey ein gemal-
ter Christus im Reich des Teuffels.

Wider den Dritten Artickel/
vnd in gemein

Das mündliche Wort sey ein alter verlegener
Schw / wo man es nicht gleubet.

Die drey Symbola gedenccken der Gerech-
tigkeit vor Gott mit keinem wort.

Die Augspurgische Confession sey ein ge-
schwornen puntschuch / schedliche Conspiration
vnd menschliches gedicht / darinnen der heiligen
Göttlichen Schrift / nicht mit einem einigen
wort gedacht werde.

Wil geschweigen wie jemmerlichen sie dem
heiligen Geist alhie in den mund gegriffen / die
heubtlehr vnserer Kirchen zerruttet / vnd darnie-
der gerissen / Als gerechtigkeit sey nicht vorge-
bung der Sünden.

Zurechenen heisse nicht einen darfuer auff-
nemen / das er nicht ist.

Ja bey dieser meinung / sey Gott ein falscher
Richter vnd schalcksfreund / wann er für gerecht
achte vnd auffneme / der nicht mit der that ge-
recht ist.

Darumb heisse Rechtfertigen auch nicht /
frey ledig vnd los zelen / Sonder mit der that ge-
recht machen.

Das

Das ist die forma grund vñ bodem der lehr
Dsiandri/ Wie er die mit seinem anhang aus al-
len kressen getrieben/ Vnd wo es im geraten we-
re/ So denck doch vmb Gotes willē/was wir
nun fur eine Religion vñ wunderlichen seltzamē
glauben hetten ?

Vm andern/ so viel die glieder der Kir-
chen belanget/ Lieber weleher hat man doch
hieruber verschonet/mit iren Judicijs nicht ge-
schendet/oder gelestert? Man hat ja dieselbigen
von ihnen begeret. Do sie nun willig gewesen/
hat man ihnen also gedancket/ das man die lie-
ben diener Christi/als weren sie hencker messige
Leuth/ nicht heimlich/ nicht mit furcht vñd
schew/ sondern frey offentlichen angeschlagen/
vñd mit allerley ehrenrürigen schrifften ausge-
schrien/als die Gotes wort verschworen/ beide
Ja vñd Nein feil tragen.

Die ist noch kein Buss/ kein reu/ kein leid/
oder bekerung/ Allein sie haben leuth bekommen
die sagen ein mahl/ Wann Dsiander feilet/ so ir-
ret er/ Wann er blind ist so sibet er nicht/ ist er a-
ber from/ so schelten wir in nicht/ In summa
Sie seind wider kalt noch warm/ Vnd damit sie
dannoch etwas sagen/ so sprechen sie Vergebung
der Sünden sey auch recht eine gerechtigkeit ge-
nennet/ vñd weis das war ist/ so sol man das le-
ren/ jennes aber bey leibe nicht straffen/ oder mā
ist rebellisch/ das sol hinfurder nicht mer verges-
sen/ sondern mit ernster straff gebüffet werden.

Das ist/ alle Christen sollen die greuliche

A iij

zerüt

zerruttung der lehr / lesterung des Herrn Ihesu
Christi / in seiner heiligen menschwerdung / etc.
Für eitel narrenwerck halten / sich die nicht lassen
bekümmern / noch zu wehklagen bewegen / Son-
dern als were es vmb eine handvol gelds / oder
ein stücke erbe vnd zeitliges gut zu thun / mit still-
schweigē vñ vergessenheit / Wie die Athenienses /
in die schantze schlahen.

Wol an so mus es den lieben Gott im Hi-
mel erbarmen / wann es auch die meinung hatt /
das alle seine schand / schmach / lesterung / verkli-
nerung / vertuuckung etc. sol allein darumb bey
den Christgleubigen hertzen vergessen werden /
domit wir im zeitlichen leben frid haben / vnd ist
vns hertz dahin gerichtet / vnd damit alle rel-
igion / Schwärmerrey / Ketzerey etc. richtig /
So kome doch nun der richter aller Welt / vnd
gebe was zu geben ist / hie wil es nicht besser wer-
den.

Man bekennet frey offentlich / das aus die-
sem spalt ein missuerstand vnter dem armen ein-
feltigen hauffen gerathen sey / dardurch viel vn-
wissender herzen jemmerlich verwiret / vnd auch
eines grossen teils verführet sint. Welcher aber die-
ser Missuerstand sey / wollen sie selbst nicht be-
kennen / vnd sollen es auch andere nicht sagen /
noch klagen. Rath nu zue / Wer hilfft alhie vnter
des den Armen gewissen? Et Conscientia ubi.

Dannoch brennen die Leuth vor Christli-
chem eyffer zu befürderung Göttlicher Ehr vnd
Warheit / mehr dann alle getrewe Pfarherrn /
Die

die bisdaher den misuerstand entdeckt / demselben
bigen geweret / vnd mit freidigem hertzen haben
wider sprochen / Ja der hitzige eiffer treibet jene /
das sie noch itzund nicht leiden wollen / das die
se den Misuerstand hinfürder sollen entdecken /
vnd die armen Seelen retten / O des Eysfers /
O der befurderung / etc.

Ach was sol man sagen? Sie dorffen dem
heiligen Apostel Paulo wider ihr eigen gewissen
schuld geben / Das er alle diese grausame greu
liche lesterung wissentliche Ketzerey vnd vn
busfertigen frefel / schwachheit des Glaubens
heisse / Derhalben man diese zarte gewissen ja
nicht verwirren / sondern zu irem begangenem
mutwillen an Gott vnd seiner Kirchen / mit
vergessung aller irer bosheit vnd büberey soll /
Gnad Herr / vnd Juncker heissen.

Wir sagen aber gleichwol (mochten sie spre
chen) Man solle leren das Vergebung der sün
den des armen Sünders Gerechtigkeit sey / das
bekennet ihr selbst / sey der haubthandel des gan
tzen Euangelij. Was nemen wir euch dann? wañ
wir euch das lassen Antwort / Lieben Herren /
wer hat euch darumme gebetē / das jr vns das las
set? Warumb haben wir es nicht vor der zeit wi
der ewer schreien geleret? Vnd danck es euch der
Gutgut / das irs nicht erweret / hetten wier euch
volgen wollen / was hetten wir darvon behalten
Nun wir es aber wider erwerben vnd des etc.

B

danck

danck erhalten / vnd ihr vns dagegen mit ewern
erdichten lügen geplaget vnd sonst jemmerlichen
gnug gemartert / Aber nichts erhalten / dann
ewer schand vnd schmach / gebt jr vns das / so ihr
nicht nemen künden / allein das ihr vns wie die
armen kinder damit stillen wolt auff das wir
ewer schwermen nicht weiter rügen / anfechten /
oder demselbigen widerstreben.

Nun wolten wirs dannoch thun / wann jr ewe
rn irtüb erkēnetet / aber wo sagt jr / das erlogē sey
was jr drobē geleret / durch dē druck in alle welt
ausgebreitet / auch im aller geringste stück? Ja
gebt vns eine rechte antzeigung einiger lebendis
ger Buß / rew / vnd hertzliches missfallens aller
ewer Gottschendung / hie ist nichts / ja schmü
cket vnd zimmert noch teglichen daran / wie irs
mit erdichtē glossen anstreichet / dem eintfeltigē
einbildet / als sey kein irriger gedanken die zeit
ewers lebens in ewr hertz vnd aus ewern munn
de gekomen. Wolt irs alhie haben / vnd ja nis
cht zu frieden sein / so wil ich euch wann ich wie
der kome / sein specificirn / vnd für die nasen mas
len / aus ewern eigenen Büchern vnd schrifften.
Darumb künth ihr auch nicht leiden / das man
dieselbige wolte einiger weise rüren / Viel weinis
ger jemandts darfur warnen / oder es sol heißen
crimen læse maiestatis |, das ihr mit executorial
mandaten vnd processen vorfolgen wolt mitt
hochster krafft vnd macht.

Solches wissen / ja greiffen wir an euch
vnd

vnd weil vns dann darwider zureden von Gott
ernstlich auffgelegt ist (wie ihr auch wol wisset)
damit der vnterscheid zwisschen rechter reiner
lehr / vnd verfürischem Teuffelischem irthumb
bey den einfeltigen / zu befurderung Gottes ehr /
vnd aller seiner seelen heil vnd seligkeit getrieben
werde / Lieber mit was gewissen durfft ihr vns
dann annuten ? wil geschweigen / ewern zorn
vnd vngnad daruber trawen / Wo wir nicht
Gottes mandat vmb ewer fergeben willen vbers
treten / den stab hin legen / das ampt dem Wero
ren Christo auff sagen / vnd nicht mehr wollen
getrewe hirtten / sondern stumme Dunde sein ?
Ja das lehret die jenigen / die so Gottfruchtig
sind als ir vnd ewers gleichen.

Es gielt hie liebe Werrn keinem Keiser vnd
fursten sein gut / ehr / oder gelimpff / Es gilt aber
Gott dem aller höchsten / vnd Christo Ihesu
seinem Sohn dem ewigen erlöser / seine ehre /
tewres blut / vnd vns armen elenden kinderlein
zu leib vnd Seel das ewige leben / das mit kei
nem Silber vnd Gold zu wechseln ist / darumb
hört auff zu schertzen / Es gild / vnd ist vns zu
vnserm teil lauter ernst.

Vnd wollen wir erstlich daruber niemands
an zeitlichen beleidigen / Sondern wie vns der
geleret / den wir furchten mehr dann ihr / mit je
derman gern fridlich sein / ja hertzlich gern von
euch leiden / was ihr vnns gleich aus G D T
tes verhencknis kunt wider alle billicheit zufüge
Vnd noch mehr / wo irs nurleidē küntet woltē

B ij wir

wir auch den fromen Gott daruber hertzlich bitten/das ers euch erkennen lasse/ vnd vergeben wolte / was wolt ihr mehr ?

So veil aber diesen handel belanget/wollen wir keines friedes/keiner verhandlung von euch gewarten / dann der/ das jr ewr Gottslesterung droben von hertzen erkennet verdammet / wider- rufft/jedermenniglichē darfur warnet / vnd also nach zeitiger buss mit vns zu Christo vnd seiner reiner lehr treten / Vnd wollen wir solchs dar- umb thuen/Nicht das wir euch wolten beschwe- ren/Sonder weil ihr bereit in der aller hochsten beschwerung vonn wegen ewer greulichen gros- sen Gottslesterung steckt / vnd das ihr viel ar- mer Seelen mit euch /dem Herren Christo ent- füret in irthumb vnd ewige Finsternis/auch bey vnsern nachkomen mochten von euch verführet werden/das jr also widerumb euch vnd andere heraussert nehmet/der entlediget/vñ in kunfftiger zeit darfur / so viel an euch ist / verwaret.

Last ihr euch aber beduncken / ihr seit mit den stücken droben rein/Vnd wollet damit allers- ding nicht vnrecht/sondern recht gehandelt ha- ben/Vnd künden wir also an euch nichts ge- winnen. Wolan so wolen wir zum aller weinis- sten zu ewern selbst eigenen verderben/ aus Got- tes beuehl vnd bruderlicher liebe sawr sehen/ vnd vns erzeigen/als die jennigen/denen an ewer Gottslesterung / vñ ewigen verderben gros- hertzeleit geschicht/vñ vermüg vnser ampts
andere

andere vor ewern schleichenden hiemlichen
giff/so viel Gott in vns gnade geben wirdt/wes
ren /in tröstlicher hoffnung/ das vielleicht der
frome getrewe ertzhirt / diesem vnd andern vns
sern jamer mit seiner zukunfft gar baldt eige
ner person wirdt abhelffen.

Bitt vnter des hiemit alle getrewe diener
des lieben Euangelij / sie wollen sich doch gar
nichts lassen erschrecken / oder klein mütig ma
chen / Sondern erstlich dem fromen Gott von
hertzen dancken / das er den greulichen irthumb
vnd Schwermerey Pseudari so gar reichlich
durch vieler Kirchen Judicia hatt lassen offent
lichen entdecken vnd aus seinem wort widerles
gen. Solcher wolthat wollen sie niemermehr
vorgessen / inen keinerley weyse lassen nehmen /
Sondern als eine sunderliche gnade rühmen / vñ
darbey bleiben.

Zum andern sich fleissig hueten vor dem
jenigen / die das arge böse giff wollen mit Zus
cker vberziehen / vñnd den schedtlichen irthumb
ans arger list / mit frembder glossa wiederumb
verstecken .

Zum dritten / Vnd damit dem leidigen Teu
ffel darinnen dester weiniger zu seinem furhaben
werde eingereumbt / Wollen sie die frembde arth
zu reden Pseudari / mit nichten dalden vñnd leis
den / Sintemal vns nicht allein aufferleget / fals
sche

sche irrige opinionen & manifestas corruptelas uere
Doctrinæ zu meiden / Sondern auch frembde vns
gewonliche art zu reden / Wie dann Paulus so
gar ernstlich befielet / ij. Timo. i. Halte dich
nach dem fürbildt der heilsamen wort / wie
du von mir gehört hast / vom glauben vñ von der
lieb in Christo Ihesu. Diesen guthen beylag
beware durch den heiligen Geist / der in vns ist.

Vnd entlich wollen sie getrost ire trew dem
fromen Gott erzeigen / idermennlichen die
greulichen lesterung droben antzeigen / ire See-
len erretten / vñ ja bey leibe nicht in einigee amnis-
stian verwilligen. Dañ wo man / sonderlichen in
haubtsachen vnsers Christlichen Glaubens so
groblich wider Gott gesündiget / vñnd solche
vñnd vñnd irthumb öffentlich fur recht gepredis-
get / im druck ausgegeben vñnd verteidiget / vñnd
damit grosse mutwillige ergernis vñnder den ar-
men gewissen angerichtet / do gilt es nicht / das
man einen solchen hauffen armer Seelen also in
die schantze schlahe / vñnd die irthumb verhele /
Sondern vor meniglichen bekenne / vñnd wider-
umb öffentlichen straffe / Auff das die verwirres-
ten gewissen nicht allein wissen was recht ist /
Sondern was auch geirret / vñnd vnrecht bisher
gewesen / domit sie daruon abstecken / sich daruor
hüten / vñnd auch andere warnen. Welchs auch
die jenigen / so den irthumb ausgegeben / hertz-
lich geru werden dulden vñnd leiden / wo sie ihn
anders erkennen / vñnd lassen von hertzen leid sein.

Wo

Wo sie aber auch das nicht thun/da gehört vns
zu straffe /vnd zu weren/wann es gleich aller ge
walt auff erden zu wider were.

Vnd ob wir darüber gleich aus Gottes
verhenckenis musten etwas leiden / So haben
wir vns doch des vnd alles guthen trostlich zu
dem fromen Gott zuuersehen / weil wir im trew
lich gedienet/das er vns auch trewlich wirt ret
ten/Vnd gar bald vom Hiemel komen mit fewr
flammen/rach zu vben/an denen/die dem Euan
gelio seind vngheorsam gewesen / vns aber /
die wir trübsal darüber leiden/die ewige
rhw mit allen auserwelten zu geben in
der ewigen herlichkeit / Amen.

Aus Brunschweig / den
23. Semptembris im
1555. Jar.

Faint, illegible text, likely bleed-through from the reverse side of the page. The text is arranged in several lines and is significantly faded.




154437


ULB Halle

003 007 596

3







Das Siandri Ir=
chumb mit keiner vorgeffenheit
zustillen / oder hin zulez
gen sey.

Joachimus Wörlin. D.

Jere. 8.
Keiner ist /dem seine bosshheit leidt were/
vnd spreche /was mach ich doch?

(Braunschweig 1555)

